

御纂醫宗金鑑卷五十

編輯幼科雜病心法要訣目錄

四診總括

面圖

察色

聽聲

審病

切脈

虎口三關脈紋圖

虎口三關部位脈紋形色

初生門

上

拭口

甘草法

黃連法

硃蜜法

豆豉法

斷臍

胡粉散

烙臍餅子

浴兒

藏胎衣法

剃頭

不啼

鞭背法

熏臍帶法

不乳

一捻金

勻氣散

理中湯

血絲天

眼不開

生地黄湯

熊膽洗法

吐不止

一捻金

香薷飲

黃連二陳湯

理中湯

不小便

導赤散

八正散

豆豉膏

不大便

硃蜜法

一捻金

大小便不通

木通散

紫霜丸

肛門內合

黑白散

蘇合香丸

噤口

龍膽湯

紫霜丸

秘方擦牙散

辰砂全蠍散

勻氣散

撮口

辰砂殭蠶散

紫霜丸

龍膽湯

撮風散

臍濕臍瘡

滲臍散

金黃散

臍突

犀角消毒飲

二豆散

臍風

驅風散

黑白散

理中湯

辰砂礪蠶散

龍膽湯

益脾散

撮風散

天釣

九龍控涎散

牛黃散

鈎藤飲

蘇合香丸

內釣

鈎藤飲

木香丸

養藏散

盤腸氣痛

白豆蔻散

熨臍法

御纂醫宗金鑑卷五十

編輯幼科雜病心法要訣

四診總論

兒科自古最爲難毫釐之差千里愆氣血未充難據脈神識未發不知言惟憑面色識因病再向三關診熱寒聽聲審病兼切脈表裏虛實隨證參

註兒科一道自古爲難蓋以小兒形質柔脆易虛易實調治少乖則毫釐之失遂致千里之謬氣血未充者氣血尙未充盈也難據脈者脈無定準不可祇以脈爲主也神識未發者茫然無知識也不知言者不能言其疾苦也診小兒

之病惟憑察面部形色識其因何而生也三關者手虎口處風氣命三關也當視脈紋形色以診其屬熱屬寒也聽聲者聽其五聲所主之病也審病者審其安煩苦欲飲食二便也切脈者切脈之浮沉遲數滑澁大小有力無力也醫者誠能以四診叅合表裏虛實寒熱之病則可保萬全也

面 部 諸 圖



面五臟部位圖



察色

欲識小兒百病原先從面部色詳觀五部五色應五藏誠中形
外理昭然額心頤腎鼻脾位右腮屬肺左屬肝青肝赤心黃脾
色白爲肺色黑腎顏青主驚風赤火熱黃傷脾食白虛寒黑色
主痛多惡候明顯濁晦輕重叅部色相生爲病順部色相尅病
多難相生實者邪助病相尅虛者正難堪天庭青暗驚風至紅
主內熱黑難痊太陽青驚入耳惡印堂青色驚瀉纏風氣青驚
紫吐逆兩眉青吉紅熱煩鼻赤脾熱黑則死唇赤脾熱白脾寒
左腮赤色肝經熱右腮發赤肺熱痰承漿青驚黃嘔吐黑主抽
搐病纏綿此是察色之大要還將脈證一同叅

註

小兒之病先從面部氣色觀之詳察五部之色則五藏之病自昭然可見矣五部者額屬心頤屬腎鼻屬脾左腮屬肝右腮屬肺也五色者青爲肝色赤爲心色黃爲脾色白爲肺色黑爲腎色也如面青主是驚風之證面赤主火熱面黃主傷脾傷食面白主虛寒面黑主痛多是惡候總之五色明顯爲新病其證輕濁晦爲久病其證重部色相生爲順者如脾病色黃此正色也若見紅色乃火能生土故爲順也若見青色乃木來尅土故爲逆也餘病倣此若氣血充實又遇部色相生縱有外邪助病亦易爲治療若久病氣血虛弱又遇部色相尅則正氣不支每難治療如天

庭青暗主驚風紅主內熱黑則不治太陽青主驚風青色入耳者死印堂青主驚瀉風池在眉下氣池在眼下二處青主驚風紫多吐逆兩眉青主吉紅色主多煩熱鼻赤主脾熱鼻黑則死脣赤主脾熱白主脾寒左腮發赤主肝經有熱右腮發赤主肺熱痰盛承漿青主驚黃主吐黑主抽搐此皆察色之大要再以脈證參之庶治得其要矣

聽聲

診兒之法聽五聲聆音察理始能明五聲相應五藏病五聲不和五藏情心病聲急多言笑肺病聲悲音不清肝病聲呼多狂叫脾病聲歌音顫輕腎病聲呻長且細五音昭著證分明啼而

不哭知腹痛哭而不啼將作驚嘔煎不安心煩熱嘔聲聲重感
寒風有餘聲雄多壯厲不足聲短怯而輕多言體熱陽府證懶
語身冷陰藏形狂言焦燥邪熱盛譫語神昏病熱凶鴨聲在喉
音不出直聲無淚命將傾虛實寒熱從聲別聞而知之無遁情

註

小兒之病既觀其色又當細聽其聲蓋笑呼歌悲呻五聲
內應心肝脾肺腎五藏也五聲不和則知五藏有病之情
矣如心屬火病則聲急喜笑肺屬金病則聲悲音濁肝屬
木病則聲狂叫多呼脾屬土病則聲顫輕如歌腎屬水病
則其聲長細如呻吟有聲有淚聲長曰哭有聲無淚聲短
曰啼如啼而不哭則氣不伸暢主腹痛哭而不啼則氣急

心煩將成驚也咳煎不安者乃心經內熱故煩躁不寧也
嘔聲音啞也聲重聲濁也此爲外感風寒也有餘之證其
氣實故聲雄大而壯厲不足之證其氣虛故聲怯弱而輕
短多言與身熱皆陽也陽主府故曰陽府證也懶語與身
涼皆陰也陰主藏故曰陰藏證也狂言焦躁者邪熱盛也
神昏譫語者熱乘於心故曰病熱凶也鴨聲聲在喉中而
啞氣將絕也直聲聲無回轉而急氣將散也二者俱爲不
治之證醫者果能以此察之則知表裏藏府寒熱虛實證
病之情態無所遁矣

審病

審兒之病貴詳參要在安煩苦欲間能食不食渴不渴二便調和通秘勘發熱無汗爲表病內熱便鞭作裏看安煩晝夜陰陽證苦欲冷暖定熱寒能食不食胃壯弱渴與不渴胃濕乾便稠黏穢爲滯熱尿清不赤乃寒占耳尻肢涼知痘疹指梢發冷主驚癇肚腹熱悶乃內熱四肢厥冷是中寒眉皺曲啼腹作痛風熱來臨耳熱纏腹痛須按軟與鞭審按不喜虛實參欲保赤子誠心辨對證施方治不難

註

小兒有病貴乎詳審先問起居安煩苦欲何如次問飲食能食不食渴與不渴又次問二便或通或秘而後病源可識矣如發熱無汗此邪在表也內熱便鞭此邪在裏也安